

Vorred.

tunckelten redē/als *Hali Clemens, Desertis, Bernhardus, Comes Palatinus* ein klein vor vnser zeit / der Hochberiebt vnd fürtrefflich *Medicus/vnnd Philosophus, Theophrastus Paracelsus*/der nitt allein in seinem schreiben die Character/vnd zaichen auch nit allein verkerete wort/sonder auch frembde namen der Metal Kreutter/vnd anderer dingen geprauchet hat /welche an in selbert das ding bedeyten / das sy findt am sentenz/ als so ich ein Teutsch Buch schriben wolt/vnd schreib die meinung Teutsch / die Haupt puncten aber Griechisch/oder schreib die meinung Griechisch / vnd die haupt Artikel Caldeisch / als da er das wort *Vsifur* für *Sulphur*/ oder Schwefel braucht/Item *Harpur* für Goldt das Quecksilber nembt er *Parintbon/vnnd de Vicriolū* oder Kupfferrauch *Samilla*/ vnd sonst viel wunderlicher worten/ doraus seine teyren Schrifften nit von meniglichem mögen verstanden werden.

Auch sonst noch mancherley/do er ein ding sein namen enzeicht/vnd jm ein andren gibt (gleich wie *Geberus, Lulius Arnoldus, Hermes*/Vnd andre) allein aus gleichnis/als do sy den *Mercurium* ein Trachen nennen darum das er Schlipferig/Vnbleiblich/vnd nit zu behalten ist/Item die vnfixen Metall/als Bley/Zin/Kupfer/ein Vogel vergleichen / darum das sey jm feyr/Weg steigen/vnd nit Fix findt noch bestan/vnd solcher auch anderer meynungen sind mancherley mit sunderlichen Buchstaben/ Schrifften/ zetchen/vnd bedeutungen/do ein jecklicher jm ein besonders erwelt/ vnd hat gefallen lassen/domit nit ein Jecklicher der es Les/gleich alle *Proces* verstande den er allein an den worten vnd dem blossen Buchstaben nach gelesen / vnd aber doraus kein andren Verstandt noch Nutz empfangen hat/dann allein den brauch der wortten. Nun achte ich das solches verborgen schreiben allein derhalb geschehen das die so solliche heimlikait beschreiben/ die grosse Lasterhafftige/Vndanckbarkeit des Menschlichen gschlechts wol wissen/derhalben sy vermeinten/Sündt zu sein/solchen Vndanckbaren Leuten/die grossen gaben Gottes/vnd Heimlikait der Natur/ also für zu werfen Hielten doch auch nit für rechtmessig/das sey die also verborgen mit jnen in jr Gruben tragen(vnd die fromen Menschen von der bösen wegen/solcher er hohen dingen berauben solten/derhalben damit es nit verloren oder verborgen wurde/vnd doch die Perlen nit für die schwein/vnd das Heiligtum nit für die Hundt geworffen/acht ich es siße also der list mit (tunckeln wortten zu schriben) erfunden vnd erdacht worden/domit die Funcken des Aufgangs solcher Göttlicher gaben/vnd deren gedechtnis in dem Gemiet der Menschen nit gar ausgelöscht wurden/ vnd das die / denen Gott die gnad verleicht/ dise *Experientz/vnd Mysteria*/glichs fals erfunden/ die aber denen es nit beschert/ durch vertuncklung solcher wort Character/vnd Zaichen/ deren dinge kein verstandt erreichen/vnd jren manglen miesten. Derhalben ich auch in meinem Ersten truck der zu Münster ausgangen dreyerley weis vnd weg dises zuuersten geordnet hat. Erstlich hab ich dise Bücher / mit reys

psal. 130.
Matt. 7.